

**Pravila za dnevne aukcije za
raspodjelu prenosnih kapaciteta na
granici između zona trgovanja EMS
AD Beograd (“EMS”)
i
Crnogorskog elektroprenosnog
sistema AD – Podgorica (“CGES”)**

SADRŽAJ

Definicije.....	4
Odjeljak 1. Uvod.....	7
Član 1.1 Uvodne napomene	7
Član 1.2 Opšti principi	7
Član 1.3 Aukcijska kuća	8
Odjeljak 2. Opšte.....	8
Član 2.1 Okvir Pravila za dnevne aukcije.....	8
Član 2.2 Aukcije	8
Odjeljak 3. Procedure i uslovi za učešće na aukciji.....	9
Član 3.1 Registracija i prihvatanje Pravila za dnevne aukcije.....	9
Odjeljak 4. Aukcijski algoritam i utvrđivanje aukcijske cijene	10
Član 4.1 Granica	10
Član 4.2 Algoritam.....	11
Član 4.3 Utvrđivanje Aukcijske cijene	11
Odjeljak 5. Aukcijska DA platforma	11
Član 5.1 Opšti uslovi.....	11
Član 5.2 Pristup Aukcijskoj DA platformi.....	12
Odjeljak 6. Specifična pravila za dnevnu Aukciju.....	13
Član 6.1 Ponude za rezervaciju kapaciteta u dnevnoj Aukciji.....	13
Član 6.2 Aukcijski postupak	14
Član 6.3 Rezultati aukcije	14
Odjeljak 7. Plaćanje	15
Član 7.1 Opšte odredbe	15
Član 7.2 Plaćanje PDV:	16
Član 7.3 Plaćanje za dnevne aukcije.....	16
Odjeljak 8. Korišćenje dodijeljenog kapaciteta	17
Član 8.1 Nacionalni komercijalni uslovi.....	17
Član 8.2 Nominacija Dodijeljenog kapaciteta	17
Odjeljak 9. Prenos prava na dodijeljeni kapacitet.....	18
Odjeljak 10. Ograničavanje kapaciteta	18

Odjeljak 11. Suspenzija Učesnika na aukciji	19
Odjeljak 12. Razno.....	19
Član 12.1 Odgovornost	19
Član 12.2 Komunikacija	20
Član 12.3 Sigurnost i zaštita podataka	21
Član 12.4 Rješavanje sporova, mjesto rješavanja i zakon koji se primjenjuje	21
Član 12.5 Rok važenja, stupanje na snagu te izmjene i dopune Pravila za dnevne aukcije	22
Član 12.6 Spisak aneksa.....	22
Aneks 1. Registracioni obrazac.....	24
Aneks 2. Spisak osoba za kontakt.....	27
Aneks 3. Spisak državnih praznika u Crnoj Gori.....	29
Aneks 4. Postupak žalbe	30
Aneks 5. Registracija na aukcijsku DA platformu.....	31

Definicije

U *Pravilima za dnevne aukcije* (uključujući anekse i obrasce) pojmovi definisani u ovom odjeljku (što se odnosi i na množinu gdje je to neophodno) imaju značenja navedena u ovom odjeljku (osim ako kontekst ne zahtijeva drugačije).

(1M EURIBOR + 3%) p.a./godišnje/	jednomjesečna kamatna stopa po kojoj jedna prvoklasna banka nudi drugoj prvoklasnoj banci oročena sredstva u euro-zoni (vidjeti: http://www.euribor.org), uvećana za 3% i obračunata uz primjenu proporcionalnog metoda.
Aukcija	tržišna metoda upravljanja zagušenjem koju su usvojili <i>Operatori prenosnih sistema</i> u cilju dodjele rapoloživih <i>Kapaciteta</i> .
Aukcijska kuća	<i>CGES</i> u funkciji <i>Aukcijske kuće</i> <i>CGES</i> podliježe svim pravima i odgovornostima koje su dodijeljene <i>Aukcijskoj kući</i> .
Aukcijska DA platforma	elektronski, web zasnovana aplikacija (<i>Aukcijska day-ahead DA platforma</i>) sa ograničenim pristupom kojom upravlja <i>Aukcijska kuća</i> <i>Dnevne Aukcije</i> koje sprovodi <i>Aukcijska kuća</i> se vrše preko <i>Aukcijske DA platforme</i> .
Aukcijska cijena	cijena posljednje prihvaćene <i>Ponude</i> (marginalna cijena) u eurima za svaki sat, koja se utvrđuje za svaku granicu i smjer u skladu sa Odjeljkom 4. Ona predstavlja cijenu koju bi trebalo da plati svaki <i>Učesnik na aukciji</i> , za svaki MW <i>Dodijeljenog kapaciteta</i> , u tom satu na toj granici i smjeru.
Vanredne situacije	uslovi i/ili događaji i/ili okolnosti, koji na osnovu stručne ocijene <i>EMS</i> i/ili <i>CGES</i> , dovode u rizik sigurnost isporuke, snabdijevanja ili prenosa električne energije, ili tehničku bezbjednost predmetnog nacionalnog prenosnog sistema ili njegovog značajnijeg dijela
Viša sila	uslovi, događaji, ili okolnosti koji su, kao i njihove posljedice, izvan realne kontrole <i>CGES-a</i> ili <i>EMS-a</i> , a koji se ne mogu spriječiti ni prevazići na osnovu realnih predviđanja i djelovanja, kao što su (ne ograničavajući se na međunarodne nametnute slobodne tokove električne energije) atmosferske pojave koje nisu mogle biti izbjegnute zbog njihovog uzroka obima, ili trajanja, zatim, neočekivane ili neizbježne havarije, odnosno, ograničenja rada proizvodnih kapaciteta, ako <i>CGES</i> ili <i>EMS</i> protiv njih mogu preduzeti jedino mjere kojima se ugrožava sigurnost isporuke i snabdijevanja, kao i sve ono što ne može biti riješeno mjerama kojima sa tehničke, finansijske ili ekonomske tačke gledišta realno raspolažu <i>CGES</i> ili <i>EMS</i> .
Vrijeme upisano na poruci /Time	sistemsko vrijeme <i>Aukcijske DA platforme</i> koje predstavlja trenutak kada

Stamp	poruka odlazi iz ili dolazi u <i>Aukcijsku DA platformu</i> <i>Vrijeme upisano na poruci</i> je mjerodavno prilikom rješavanja sporova.
Dodijeljeni kapacitet	<i>Kapacitet</i> koji <i>Učesnik na aukciji</i> dobije kada se objave rezultati <i>Aukcije</i> <i>Dodijeljeni kapacitet</i> garantuju <i>Operatori prenosnih sistema</i> , koji su se na to obavezali <i>Aukcijskoj kući</i> , u skladu sa ovim <i>Pravilima za dnevne aukcije</i> .
EIC kod	identifikacioni kod za energetske subjekte, koji služi za jasnu identifikaciju subjekata u prekograničnoj razmjeni <i>EIC kodove</i> izdaju lokalne kancelarije za izdavanje, a lista sa izdatim kodovima se objavljuje na <i>ENTSO-E</i> internet stranici https://www.entsoe.eu/data/energy-identification-codes-eic/eic-approved-codes/ .
EMS (EMS AD Beograd)	preduzeće sa registrovanim sjedištem u Beogradu, Kneza Miloša 11, Srbija koje je upisano u registar Agencije za privredne registre pod matičnim brojem 20054182
ENTSO-E	udruženje evropskih operatora prenosnih sistema za električnu energiju
Identifikacija ugovora o kapacitetu /Capacity Agreement Identification/ (“CAI”)	oznaka koja na jedinstven način identifikuje pravo na kapacitet
Iznos ponude	zahtijevana količina <i>Kapaciteta</i> u MW (sastavni dio <i>Ponude</i>)
ITR (Interconnection Trade Responsible) / Strana odgovorna za interkonektivnu razmjenu/	učesnik na tržištu koga <i>Operatori prenosnih sistema</i> prepoznaju kao odgovornog za prijavu po <i>Dodijeljenom kapacitetu</i> On mora biti identifikovan <i>EIC kodom</i> . Sa strane <i>EMS-a</i> , to je učesnik na tržištu sa važećim ugovorom o balansnoj odgovornosti zaključenim sa <i>EMS-om</i> . Sa strane <i>CGES-a</i> , to je pravno lice koje je zaključilo ugovor o balansnoj odgovornosti sa <i>CGES-om</i> i koje se za učešće na <i>Aukciji</i> registrovalo kod <i>CGES-a</i> .
Kapacitet	prekogranični prenosni kapacitet u MW
Korisnik	osoba koja ima pravo da koristi <i>Aukcijsku DA platformu</i> u ime <i>Učesnika na aukciji</i>

CGES (Crnogorski elektroprenosni sistem AD – Podgorica)	pravno lice sa registrovanim sjedištem u Podgorici, Bulevar Svetog Petra Cetinjskog br. 18, upisano u Centralni Registar pravnih subjekata Crne Gore pod brojem: 4-0008972.
Operator prenosnog sistema	pravno lice odgovorno za rad, održavanje, i ako je potrebno, razvoj prenosnog sistema u datoj oblasti i, gdje se može primijeniti, i njegovih interkonekcija sa drugim sistemima, kao i za osiguranje dugoročne sposobnosti sistema da ispuní realne potrebe za prenosom električne energije
Operatori prenosnih sistema	Operatori prenosnog sistema koji učestvuju u ovoj zajedničkoj aukcijskoj proceduri, tj. <i>EMS</i> i <i>CGES</i>
Ponuda	zahtjev <i>Učesnika na aukciji</i> za rezervaciju <i>Kapaciteta</i> sa jasno definisanom količinom zahtijevanog <i>Kapaciteta (Iznos ponude)</i> po specificiranoj cijeni (<i>Ponuđena cijena</i>) koji se dostavlja za određenu granicu i smjer (MW, EUR/MW/h)
Ponuđena cijena	cijena u eurima koju je <i>Učesnik na aukciji</i> spreman da plati za 1 MW <i>Kapaciteta</i> , za svaki sat
Ponuđeni kapacitet	<i>Kapacitet</i> koji nude i garantuju predmetni <i>Operatori prenosnih sistema</i> na granici i smjeru za period naznačen u <i>Aukcijskoj</i> proceduri.
Pravila za dnevne aukcije	pravila za dnevne aukcije za raspodjelu prenosnih kapaciteta na granici između zona trgovanja EMS AD Beograd (“EMS“) i Crnogorskog elektroprenosnog sistema AD – Podgorica (“CGES“)
Radni dan	kalendarski dani, od ponedjeljka do petka, osim državnih praznika u Crnoj Gori
Zona trgovanja	Najveće geografsko područje unutar koga učesnici na tržištu mogu razmjenjivati energiju bez raspodele prenosnog kapaciteta.
Rezervacioni period	period za koji je <i>Kapacitet</i> ponuđen na <i>Aukciji</i>
SEV	srednjoevropsko vrijeme
Ugovor o Energetskoj zajednici	Ugovor kojim se osniva Energetska zajednica Evropske zajednice s jedne strane i Albanije, Bugarske, Bosne i Hercegovine, Hrvatske, Sjeverne Makedonije, Crne Gore, Rumunije, Srbije i UNMIK sa druge strane, potpisan 25. oktobra 2005. godine

Ugovor o pravu pristupa prenosnom sistemu (Ugovor)	ugovor između <i>Aukcijske kuće</i> i <i>Učesnika na aukciji</i> za učestvovanje na <i>Aukciji</i> na granici Crna Gora - Srbija, zaključen potvrdom registracionog obrasca <i>Učesnika na aukciji</i> od strane <i>Aukcijske kuće</i> <i>Pravila za dnevne aukcije</i> predstavljaju opšte uslove ovog ugovora.
Uredba EU 714/2009	Uredba Evropskog Parlamenta i Vijeća od 13.jula 2009. godine o uslovima za pristup mreži za prekogranične razmjene električne energije
Učesnik na aukciji	Subjekt sa jedinstvenim <i>EIC kodom</i> , registrovan u <i>Aukcijskoj kući</i> , u skladu sa članom 3.1.

Odjeljak 1. Uvod

Član 1.1 Uvodne napomene

U skladu sa *Ugovorom o Energetskoj zajednici* i odlukom Ministarskog vijeća Energetske Zajednice kojom je prihvaćena primjena *Uredbe EU 714/2009*, uspostavlja se tržišni mehanizam za raspodjelu *Kapaciteta* učesnicima na tržištu.

Da bi se postigla maksimalna transparentnost u dodjeli ovog prenosnog kapaciteta i da bi se izbjegla diskriminacija u dodjeli kapaciteta, *Operatori prenosnih sistema* će organizovati zajedničku raspodjelu prekograničnih kapaciteta.

Član 1.2 Opšti principi

Operatori prenosnih sistema su se saglasili da uvedu zajedničku aukcijsku proceduru dodjele raspoloživih *Kapaciteta* na granici Crna Gora - Srbija učesnicima na tržištu.

Zbog tehničkih ograničenja u regionalnoj prenosnoj mreži, na granici Srbija - Crna Gora, može doći do pojave zagušenja.

Pravila za dnevne aukcije su sačinjena u skladu sa *Uredbom EU* i *Ugovorom o Energetskoj zajednici*, nacionalnim zakonima koje primjenjuju *Operatori prenosnih sistema*, i propisima koje su utvrdila nacionalna regulatorna tijela.

Cilj zajedničkih *Aukcija* je da se učesnicima na tržištu ponudi transparentan i nepristrasan način za dodjelu raspoloživog *Kapaciteta*.

Operatori prenosnih sistema su se obavezali da će preko *Aukcijske kuće* i putem *Aukcije* ponuditi sve raspoložive *Kapacitete* u *Rezervacionom periodu* za koji je određen *Ponuđeni kapacitet*.

Metodologija za izračunavanje *Kapaciteta* za granicu Crna Gora - Srbija se zasniva na *ENTSO-E* metodologiji za izračunavanje raspoloživog prenosnog kapaciteta. Pri utvrđivanju dnevnih raspoloživih prenosnih kapaciteta uzimaće se u obzir sljedeće:

- mjesečni *Kapacitet* koji nije dodijeljen u mjesečnoj *Aukciji*;

- godišnji i/ili mjesečni kapacitet koji je bio već dodijeljen, a koji je oduzet od *Učesnika na aukciji* po osnovu neplaćanja;
- godišnji i mjesečni *Kapacitet* koji je dodijeljen, a nije prijavljen *EMS-u* i *CGES-u* u postupku prijavljivanja dnevnih planova rada na osnovu dugoročnih *Kapaciteta* po principu “Iskoristi ili prodaj” (UIOSI)
- efekti netovanja na osnovu prijave dnevnih planova rada u suprotnom smjeru.

Član 1.3 Aukcijska kuća

Aukcijska kuća je odgovorna za organizovanje *Aukcija* u skladu sa *Pravilima za dnevne aukcije*. *Aukcijska kuća* sprovodi *Aukcije* i osigurava relevantne podatke učesnicima na tržištu i *Operatorima prenosnih sistema*.

Operatori prenosnih sistema su saglasni da će dnevne *Aukcije*, u funkciji *Aukcijske kuće*, vršiti *CGES*. Na osnovu toga, ugovorni odnosi u smislu ovih *Aukcija* obuhvataju samo odnos između *CGES-a* i *Učesnika na aukciji*.

Operatori prenosnih sistema su se obavezali da *Kapacitet* učine dostupnim u mjeri u kojoj je preko *Aukcijske kuće* dodijeljen *Učesniku na aukcijama*, uz izuzeće slučajeva opisanih u Odjeljku 10.

Odjeljak 2. Opšte

Član 2.1 Okvir Pravila za dnevne aukcije

Ova *Pravila za dnevne aukcije* sadrže rokove i uslove za dodjelu dnevnog *Kapaciteta* u oba smjera na granici Crna Gora - Srbija.

Između ostalog, *Pravila za dnevne aukcije* propisuju uslove koje *Učesnik na aukciji* mora ispuniti kako bi učestvovao na *Aukciji*, aukcijski algoritam (uključujući utvrđivanje *Aukcijske cijene* kao rezultata *Aukcije*), kao i uslove za korišćenje *Dodijeljenog kapaciteta*.

Objavom rezultata dnevne *Aukcije*, *Kapacitet* se dodjeljuje odgovarajućim *Učesnicima na aukciji*. Informacije o *Aukcijama* su dostupne na internet stranicama *Aukcijske kuće*.

Operatori prenosnih sistema su se obavezali da će prihvatiti rezultate zajedničkih *Aukcija* i da će rezervisati *Kapacitete* za *Učesnike na aukciji* u skladu sa pojedinačnim rezultatima *Aukcije*. Svaki *Operator prenosnog sistema* se obavezao da će izvršiti usluge prenosa po svojim uslovima, a u skladu sa zakonom koji se na njih primjenjuje (vidjeti Odjeljak 8).

Pristup prenosnom sistemu nije obuhvaćen i garantovan *Pravilima za dnevne aukcije* ili rezultatima *Aukcije*.

Član 2.2 Aukcije

Aukcijska kuća organizuje dnevne *Aukcije*.

Aukcije se održavaju za rezervaciju Kapaciteta za oba smjera na granici Crna Gora - Srbija, za sljedeće Rezervacione periode:

- za dnevnu *Aukciju – Rezervacioni period* obuhvata svaki pojedinačni sat u toku 24 sata određenog kalendarskog dana (23 ili 25 sati pri promjeni računanja vremena).

Ponuđeni kapaciteti za dnevne Aukcije se objavljuju na Aukcijskoj DA platformi (<https://ess.cges.me/Auction-Client/>) do 09:00h (SEV) na dan kada se sprovodi dnevna Aukcija osim u slučaju promjene dnevnog operativnog režima (vidjeti članove 5.1 i 6.2).

Ako dođe do ograničavanja dodijeljenih godišnjih i mjesečnih kapaciteta, dnevne Aukcije i unutardnevne alokacije na odgovarajućoj granici i smjeru će biti obustavljene.

Odjeljak 3. Procedure i uslovi za učešće na aukciji

Član 3.1 Registracija i prihvatanje Pravila za dnevne aukcije

Operatori prenosnih sistema postavljaju sljedeće preduoslove za učešće u dnevnoj Aukciji:

- **Na strani EMS-a** – Pravno lice ili preduzetnik koji je zaključio ugovor o balansnoj odgovornosti sa *EMS-om*.
- **Na strani CGES-a** – Pravno ili fizičko lice, odnosno preduzetnik, koje je registrovano kod operatora prenosnog sistema i operatora tržišta kao učesnik na tržištu Crne Gore u skladu sa tržišnim pravilima odnosno zaključilo ugovor o balansnoj odgovornosti sa operatorom tržišta i operatorom prenosnog sistema

*Samo učesnici na tržištu koji izjave pod punom zakonskom odgovornošću da su u potpunosti upoznati sa *Pravilima za dnevne aukcije* i da neopozivo prihvataju važeća *Pravila za dnevne aukcije* koja su objavljena na internet stranici *Aukcijske kuće* mogu da učestvuju u dnevnoj Aukciji.*

Ovu izjavu Učesnik na aukciji daje tako što dostavlja ispravno potpisan registracioni obrazac (vidjeti Aneks 1). Ukoliko se Učesnik na aukciji prvi put registruje za učešće na dnevnim Aukcijama uz registracioni obrazac treba dostaviti i sljedeća dokumenta:

- original ili ovjerena kopija izvoda iz privrednog registra (crnogorskom, srpskom ili na engleskom jeziku).
- potvrda o registraciji poreskog obveznika
- spisak ovlašćenih predstavnika koji imaju pravo da komuniciraju sa *Aukcijskom kućom* u ime *Učesnika na aukciji* i da izvršavaju obaveze prema *Aukcijskoj kući* (vidjeti Dodatak 1 Aneksa 1).

U slučaju promjene podataka dostavljenih u procesu registracije, Učesnik na aukciji je u obavezi da dostavi ažurirane verzije navedenih dokumenata.

Svi djelovi registracionog obrasca moraju sadržavati potpune i tačne podatke.

Svaki *Učesnik na aukciji* se identifikuje jednim važećim i jedinstvenim *EIC kodom* izdatim za *Učesnika na aukciji*, saglasno zakonu, i registrovanim na spisku *EIC kodova* koji je objavljen na internet stranicama *ENTSO-E*.

Tri potpisana primjerka registracionog obrasca moraju biti dostavljena *Aukcijskoj kući* u pisanoj formi poštom, preko dostavljača ili lično. Registracioni obrazac se dostavlja na adresu *Aukcijske kuće* ili lično na arhivu *Aukcijske kuće* (vidjeti Aneks 2). Smatraće se da registracioni obrazac nije podniet ukoliko je dostavljen faksom ili elektronskom poštom ili ukoliko je nepotpun, o čemu će *Aukcijska kuća* obavijestiti podnosioca, uz navođenje razloga zbog kojih registracija nije izvršena. *Aukcijska kuća* može da traži dopunu informacija dostavljenih u registracionim obrascima i njihovim priložima u primjerenom roku. Obavještenje o potvrdi ili neprihvatanju registracije će biti poslato elektronskom poštom, na adresu unijetu u registracioni obrazac. Krajnji rok za podnošenje registracionog obrasca za registraciju *Učesnika na aukciji* za dnevne *Aukcije* je 12:00 sati (SEV), pet (5) *Radnih dana* prije datuma sprovođenja dnevne *Aukcije*.

Izjava važi za neodređeni broj *Aukcija* bez obzira na obavezu *Učesnika na aukciji* da *Aukcijsku kuću* odmah obavijesi o bilo kakvim promjenama i bez obzira na pravo *Aukcijske kuće* da zahtijeva ažuriranje ili ponovno dostavljanje bilo kog dijela prethodno navedene registracione dokumentacije.

Prihvaćeni registracioni obrazac koji je potpisao ovlašteni predstavnik *Aukcijske kuće* i zaveden je u arhivi *Aukcijske kuće* predstavlja *Ugovor* između *Aukcijske kuće* i *Učesnika na aukciji* koji se odnosi na dnevne *Aukcije* u kalendarskoj godini. *Pravila za dnevne aukcije* predstavljaju opšte uslove *Ugovora*.

Svaki *Učesnik na aukciji* može promijeniti svoj spisak ovlaštenih predstavnika ili druge podatke navedene u Dodatku 1 registracionog obrasca. Na osnovu ažuriranog i validno potpisanog Dodatka 1 registracionog obrasca kojeg *Učesnik na aukciji* dostavi osobama zaduženim za registraciju *Učesnika na aukciji* (vidjeti Aneks 2), *Aukcijska kuća* će *Učesniku na aukciji* potvrditi registraciju te promjene najkasnije tri (3) *Radna dana* nakon što primi ažuriran i validno potpisan Dodatak 1 registracionog obrasca. Obavještenje o potvrdi će biti poslato elektronskom poštom na adresu unijetu u registracioni obrazac *Učesnika na aukciji*.

S obzirom da se *Aukcije* vrše preko *Aukcijske DA platforme*, *Učesnik na aukciji* ima obavezu da ispuni preduslove za pristup *Aukcijskoj DA platformi* navedene u članu 5.2.

Odjeljak 4. Aukcijski algoritam i utvrđivanje aukcijske cijene

Član 4.1 Granica

Granica Crna Gora - Srbija je uključena u zajedničku proceduru dnevne dodjele *Kapaciteta*.

Rezervacija *Kapaciteta* (jednakog punom ili umanjenom *Iznosu ponude*) je rezultat *Aukcijskog* postupka zasnovanog na pojedinačnim *Ponuđenim cijenama* za tu granicu i smjer. Ovaj postupak uzima u obzir *Ponuđene kapacitete* na ovoj granici.

Član 4.2 Algoritam

Aukcijska kuća uređuje sve primljene *Ponude* po opadajućem redosljedu na osnovu pojedinačnih *Ponuđenih cijena* praveći prioritetni redosljed za granicu i smjer na koje se pojedinačne *Ponude* odnose.

Ako *Ponuda* koja se razmatra, zajedno sa već prihvaćenim *Ponudama*, ne prelazi vrijednost *Ponuđenog kapaciteta* na toj granici, *Aukcijska kuća* će je prihvatiti, a traženi *Kapacitet* će biti dodijeljen *Učesniku na aukciji*.

Ako *Ponuda* koja se razmatra zajedno sa već prihvaćenim *Ponudama*, prelazi vrijednost *Ponuđenog kapaciteta* na toj granici, ta *Ponuda* će se prihvatiti sa umanjenim *Iznosom ponude* do vrijednosti *Ponuđenog kapaciteta*, osim ako nije odabrana opcija „sve ili ništa“. U ovom trenutku se završava dodjela *Kapaciteta* na toj granici i smjeru zbog dostizanja ograničenja zadatog vrijednošću *Ponuđenog kapacita*.

Ako u prioritetnom redosljedu postoje dvije ili više *Ponuda* sa istom *Ponuđenom cijenom*, a zbir svih ovih *Ponuda*, zajedno sa već prihvaćenim *Ponudama* prelazi vrijednost *Ponuđenog kapaciteta* (marginalne *Ponude*), prilikom rangiranja prednost imaju *Ponude* koje imaju ranije *Vrijeme upisano na poruci*.

Član 4.3 Utvrđivanje Aukcijske cijene

Ako zbir svih prihvaćenih *Ponuda* ne prekorači vrijednost *Ponuđenog kapaciteta* na granici i smjeru, tada je *Aukcijska cijena* za tu granicu i smjer jednaka nuli.

Ako zbir svih primljenih *Ponuda* pređe vrijednost *Ponuđenog kapaciteta* na toj granici, *Aukcijska cijena* je jednaka najnižoj *Ponuđenoj cijeni* od svih *Ponuda* koje su prihvaćene na toj granici i smjeru, tj. cijeni posljednje prihvaćene *Ponude*.

Učesnik na aukciji je obavezan da plati *Aukcijsku cijenu* utvrđenu za tu granicu i smjer za svaki MW *Dodijeljenog kapaciteta*, saglasno Odjeljku 7 ovih pravila.

Odjeljak 5. Aukcijska DA platforma

Član 5.1 Opšti uslovi

Aukcijska kuća će organizovati i sprovoditi zajedničke *Aukcije* za dodjelu dnevnih raspoloživih *Kapaciteta* elektronski, u korisničkom okruženju *Aukcijske DA platforme*.

Aukcijska kuća će *Korisnicima* osigurati dokumentaciju za korišćenje *Aukcijske DA platforme* (na internet stranici <http://www.cges.me/trziste/pravila-za-alokaciju-kapaciteta>, uputstva za korišćenje *Aukcijske DA platforme*, kao i korisničku podršku.

Aukcijska kuća zadržava pravo promjene dnevnog operativniog režima rada u razumnim slučajevima, posebno kada nastanu sljedeći tehnički problemi: opšti kolaps interneta, kolaps svih internet konekcija *Aukcijske DA platforme*, kolaps *Aukcijske DA platforme* (serveri, baza

podataka ili greška u aplikacijama *Aukcijske DA platforme*) ili kolaps informacionih sistema koje *CGES* i/ili *EMS* koriste u procesu nominacije.

Svi *Korisnici Aukcijske DA platforme* će, bez odlaganja, biti obaviješteni o tekućem operativnom stanju.

Svi rokovi definisani u *Pravilima za dnevne aukcije*, posebno krajnji rokovi za prenos podataka, objavu rezultata, itd, definisani su u sistemskom vremenu *Aukcijske DA platforme*. Sistemsko vrijeme je dostupno *Korisniku* prilikom direktnog pristupa *Aukcijskoj DA platformi*.

Prijem podataka će biti važeći samo ako je te podatke prihvatio server *Aukcijske DA platforme* prije isteka roka za podnošenje tih podataka i ako je *Aukcijska DA platforma* potvrdila taj prijem.

Poslije isteka tog roka, prijem podataka neće biti moguć.

Da bi bile uzete u obzir u *Aukcijskoj* proceduri, *Ponude* moraju biti dostavljene *Aukcijskoj DA platformi*. *Učesnik na aukciji* može izmijeniti već dostavljene *Ponude* prije isteka roka za podnošenje *Ponuda*.

Poslije unosa/izmjene *Ponuda*, *Učesnik na aukciji* prima potvrdu. Ukoliko se prilikom unosa i izmjene *Ponuda* dogodi nepravilnost, *Ponude* će biti odbijene, a *Učesnik na aukciji* će biti obaviješten o razlogu/razlozima odbijanja *Ponuda* porukom na *Aukcijskoj DA platformi*. Posljednja prihvaćena *Ponuda* i potvrđena izmjena *Ponude* su obavezujuće za *Učesnika na aukciji*.

Potvrda prijema *Ponuda* na *Aukcijskoj DA platformi* je odlučujući kriterijum za donošenje odluke da li je *Ponuda* dostavljena u roku predviđenom za podnošenje *Ponuda*. *Učesnik na aukciji* je odgovoran za pravovremeno dostavljanje *Ponude* i/ili njenih izmjena *Aukcijskoj kući*.

Ponuda koja ne ispunjava bilo koji od uslova navedenih u *Pravilima o dnevnim aukcijama* mora biti odbačena i ne može biti uvrštena među *Ponude* koje će se obrađivati aukcijskim algoritmom.

Korisnici mogu dostavljati podatke *Aukcijskoj DA platformi* (ili primati podatke od nje) na dva načina:

- direktnim unosom,
- preko XML fajla.

Član 5.2 Pristup Aukcijskoj DA platformi

Da bi *Učesnici na aukciji* pristupili *Aukcijskoj DA platformi* neophodno je da imaju instalisanu aplikaciju koja se može preuzeti sa web servera *Aukcijske kuće*. *Aukcijska DA platforma* je dostupna svim *Učesnicima na aukciji* koji imaju korisnički nalog dobijen od *Aukcijske kuće*.

Nakon što *Aukcijska kuća* potvrdi prijem dokumentacije o registraciji *Učesnika na aukciji*, na *Aukcijskoj DA platformi* se otvara korisnički nalog.

Učesnik na aukciji dužan je dostaviti kompletno popunjen i potpisan zahtjev (Aneks 5) za otvaranje i modifikovanje naloga za sve *Korisnike*. Potpisivanjem zahtjeva *Korisnik* prihvata obaveze i pravila ponašanja utvrđene ovim pravilima. Zahtjev mora sadržavati potpune i tačne

informacije. *Aukcijska kuća* će formirati korisnički nalog i lozinku u roku od tri (3) *Radna dana* nakon dobijanja zahtjeva. Jedan *Učesnik na aukciji* može da ima više korisničkih naloga.

Svaki *Korisnik* sa korisničkim nalogom obavještava se o uspostavljanju ili modifikaciji svog korisničkog naloga putem elektronske pošte na kontakt adresu koja je navedena u zahtjevu. Informacije koje *Aukcijska kuća* šalje putem elektronske pošte obuhvatiće ulazni ključ koji se sastoji od korisničkog imena (*username*) i nove lozinke (*password*) kad je riječ o novom korisničkom nalogu. *Korisnik* je dužan da promijeni lozinku u toku prvog prijavljivanja. *Korisnik* je dužan da ovu informaciju tretira kao povjerljivu. *Učesnik na aukciji* je odgovoran za sve direktne i indirektno štete koje su rezultat neovlaštenog otkrivanja tih informacija od strane *Korisnika*. *Aukcijska kuća* nije odgovorna za neovlašteno korišćenje ulaznog ključa koji obuhvata korisničko ime i lozinku.

Aukcijska kuća ima pravo da provjeri informacije navedene u zahtjevu koji pošalju potencijalni *Korisnici* i da ne otvori korisnički nalog u slučaju bilo kog neslaganja između datih podataka ili sumnje u njegovo postojanje. *Aukcijska kuća* ima pravo onemogućiti *Korisniku* pristup *Aukcijskoj DA platformi* ukoliko pronađe bilo kakvo neslaganje kao što su: lažni podaci o korisniku, istekla važnost *Ugovora* između *Aukcijske kuće* i *Učesnika na aukciji* ili nepoštovanje Pravila za dnevne aukcije.

Učesnik na Aukciji je dužan da sve informacije koje se odnose na pristup *Aukcijskoj DA platformi* čuva kao lične i povjerljive i biće odgovoran za bilo koje direktne, ili indirektno štete koje se pojave kao posljedica bilo kakvog neovlaštenog otkrivanja takvih informacija. *Aukcijska kuća* nije odgovorna za bilo koje neovlašteno korišćenje korisničkog imena i lozinke.

Aukcijska kuća će imati pravo da *Učesniku na aukciji* onemogući pristup *Aukcijskoj DA platformi*, u slučaju otkrivanja bilo kakvih nepravilnosti koje se, ali ne ograničavajući se samo na njih, odnose na informacije o *Učesniku na aukciji*, u slučaju da *Ugovor* više nije na snazi ili nepoštovanje Pravila za dnevne aukcije od strane *Učesnika na aukciji*.

Odjeljak 6. Specifična pravila za dnevnu Aukciju

Aukcijska kuća će organizovati i sprovoditi zajedničke *Aukcije* dnevnog raspoloživog *Kapaciteta* elektronski, u korisničkom okruženju *Aukcijske DA platforme*.

Dnevne *Aukcije* će se održavati svakog dana (ponedjeljak - nedjelja).

Član 6.1 Ponude za rezervaciju kapaciteta u dnevnoj Aukciji

Svaka *Ponuda* koju za dnevnu *Aukciju* dostavlja *Učesnik na aukciji* mora sadržavati sljedeće nedvosmislene i jasne specifikacije:

- a) identifikaciju *Korisnika*.
- b) specifikaciju granice i smjera.
- c) dan na koji se *Ponuda* odnosi.
- d) za svaki sat dana, *Ponude* sa sljedećim specifikacijama:

- i. iznos zahtijevanog *Kapaciteta* u MW, bez decimala; minimalni iznos jedne *Ponude* je 1 MW;
Maksimalni iznos jedne *Ponude* za određenu granicu i smjer je jednak *Ponuđenom kapacitetu*.
- ii. *ponuđena cijena* u EUR/MW po satu sa najviše dvije decimale
Ponuđena cijena mora biti veća od nule (minimalna vrijednost je 0.01 EUR/MW po satu).

Samo *Učesnici na aukciji* koji ispunjavaju preduslove za korišćenje *Kapaciteta* na datoj granici (vidjeti Odjeljak 8) mogu učestvovati u dnevnoj *Aukciji* na ovoj granici.

Član 6.2 Aukcijski postupak

Ako *Ponuđeni kapaciteti* za neku dnevnu *Aukciju* ne mogu biti objavljeni do 09:00h (SEV) zbog promjene dnevnog operativnog režima (vidjeti član 5.1), dnevna *Aukcija* za ovaj dan biće odložena najkasnije do 12:00 (SEV). U slučaju da nije moguće obezbijediti nesmetano sprovođenje dnevne aukcije sa početkom do 12:00h, dnevna aukcija neće biti organizovana, a učesnik na tržištu ne može tražiti nikakvo obeštećenje po tom osnovu.

Svi *Korisnici Aukcijske DA platforme* će, bez odlaganja, biti obaviješteni o tekućem operativnom stanju.

Aukcijska kuća je dužna preduzeti sve opravdane mjere kako bi izbjegla slučajeve da se neka dnevna *Aukcija* ne organizuje ili otkaže.

Svaki *Učesnik na aukciji* dostavlja svoje *Ponude* od 09:00 (SEV) preko *Aukcijske DA platforme*, osim u slučaju promjene dnevnog operativnog režima (vidjeti član 5.1).

Vremenski rok za dostavljanje ponuda je 30 minuta od početka aukcijskog postupka.

Ponude koje ne ispunjavaju bilo koji uslov naveden u *Pravilima za dnevne aukcije* moraju biti odbačene i ne mogu biti uvrštene među *Ponude* za obradu.

Sve *Ponude* koje ispunjavaju zahtjeve navedene u ovom odjeljku biće predmet evaluacije, a *Aukcijska cijena* će se utvrditi u skladu sa pravilima navedenim u Odjeljku 4.

Član 6.3 Rezultati aukcije

Aukcijska kuća objavljuje rezultate dnevne *Aukcije* svakog dana do 09:45h (SEV) – osim u slučaju promjene dnevnog operativnog režima (vidjeti član 5.1). Sljedeći rezultati će biti objavljeni preko *Aukcijske DA platforme*, na internet stranici *Aukcijske kuće* (<http://www.cges.me/trziste/aukcije-kapaciteta>) i na ENTSOe Transparency platformi:

- datum i *Rezervacioni period*,
- specifikacija granice i smjera,
- ukupan zahtijevani *Kapacitet* od strane *Učesnika na aukciji* za svaki sat u MW,
- ukupan *Dodijeljeni kapacitet Učesnicima na aukciji* za svaki sat u MW,
- *Aukcijska cijena* za svaki sat u EUR/MW/h,

- neto prenosni kapacitet (NTC),
- *Ponuđeni kapacitet.*

Sljedeći podaci su na raspolaganju poslije 09:45h (SEV) (osim u slučaju promjene dnevnog operativnog režima (vidjeti član 5.1)) za *Učesnika na aukciji* na *Aukcijskoj DA platformi*, za svaku granicu i smjer na kojima su njihove *Ponude* evaluirane:

- datum i *Rezervacioni period*,
- identifikaciona oznaka *Aukcije*,
- specifikacija granice i smjera,
- *Ponuđeni kapacitet*,
- *Dodijeljeni kapacitet* u MW,
- *Aukcijska cijena* u EUR/MW po satu,
- status *Ponude*,
- *Identifikacija ugovora o kapacitetu (CAI)*.

Ako se rezultati dnevne *Aukcije* ne objave preko *Aukcijske DA platforme* do 13:00 (SEV) u slučaju promjene dnevnog operativnog režima (vidjeti član 5.1), dnevna *Aukcija* za taj dan i za datu granicu će se poništiti i učesnik na tržištu po tom osnovu ne može da zahtijeva nikakvu nadoknadu.

Svi relevantni *Korisnici Aukcijske DA platforme* će, bez neopravdanog kašnjenja, biti obaviješteni o prekidu i/ili suspenziji rada *Aukcijske DA platforme*.

Odjeljak 7. Plaćanje

Član 7.1 Opšte odredbe

Plaćanje se obavlja u EUR.

Datum plaćanja ili izvršenja plaćanja je dan kada se navedeni iznos knjiži na račun *Aukcijske kuće*.

Računi moraju biti plaćeni najkasnije do datuma navedenog na računu, bez provizija ili odbitaka. *Učesnik na aukciji* nema pravo na obeštećenje bilo kog iznosa ili neizmirenje dugovanja nastalih iz obaveza prema *Aukciji*, na osnovu bilo kojeg potraživanja od *Aukcijske kuće*, bez obzira da li su ta potraživanja nastala kao posljedica *Aukcije* ili ne.

Aukcijska kuća će *Učesniku na aukciji* izdati račun za iznos koji duguje na ime *Dodijeljenog kapaciteta*, zaokružen na dvije decimale. *Aukcijska kuća* će korigovati iznos dospio za plaćanje u slučaju da dođe do povećanja ili smanjenja iznosa, ili uvođenja ili oslobađanja od plaćanja poreza, dažbina, ili drugih sličnih situacija.

Originali računa se *Učesniku na Aukciji* šalju poštom. Kopije računa se šalju mailom, i to najkasnije na dan izdavanja računa.

Učesnik na aukciji plaća sve bankarske provizije za transakcije koje proizlaze iz učešća u *Aukcijskoj* proceduri. Bankarske troškove posredničke banke (ukoliko se jave) snosi *Učesnik na aukciji*.

U slučaju kašnjenja u plaćanju, *Aukcijska kuća* ima pravo zaračunati kamatu na dospeli iznos za svaki započeti dan kašnjenja u plaćanju. Dnevna kamatna stopa za plaćanje u EUR se utvrđuje prvog *Radnog dana* svakog kalendarskog mjeseca u toku godine, u iznosu koji je jednak $1M \text{ EURIBOR} + 3\% \text{ godišnje}$, obračunat pomoću proporcionalnog metoda.

Svako plaćanje ima svoj identifikacioni broj, što u stvari predstavlja broj računa. Uplata mora odgovarati iznosu duga (t.j. iznosu navedenom na odgovarajućem izdatom računu) preko identifikacionog broja koji je naveden na računu i obračunatog/plaćenog iznosa. U slučaju da se iznos za plaćanje i/ili identifikacioni broj razlikuju od podataka iz obračuna, smatraće se da dug nije plaćen sve do trenutka podmirenja cjelokupnog duga.

Član 7.2 Plaćanje PDV:

Za pravna lica koja imaju sjedište u Crnoj Gori:

- PDV se obračunava u skladu sa važećim Zakonom o PDV-u. Po ovom modelu, *Aukcijska kuća* zaračunaće PDV na iznos za plaćanje i posebno će ga navesti u računu i *Učesnik na aukciji* će platiti cjelokupan iznos u EUR sa uključenim PDV, po uputstvima za plaćanje datim u računu.

Za pravna ili fizička lica odnosno preduzetnike koji nemaju sjedište u Crnoj Gori:

- Ne zaračunava se PDV. Po ovom modelu, *Učesnici na aukciji* moraju dostaviti *Aukcijskoj kući* svoje poreske identifikacione brojeve i dužni su izmiriti PDV kod nadležnih državnih poreskih vlasti.

Ukoliko *Učesnik na aukciji* u predviđenom roku ne ispuni, ili samo djelimično ispuni obaveze koje proizlaze iz *Ugovora*, a naročito ako *Učesnik na aukciji* ne plati punu *Aukcijsku cijenu* u roku koji je naveden u *Pravilima za dnevne aukcije*, *Aukcijska kuća* ima pravo raskinuti *Ugovor* i smatrati *Učesnika na aukciji* odgovornim za plaćanje *Aukcijske cijene*, kamata, naknada i troškova koji proističu iz raskida *Ugovora*.

Učesnik na aukciji neće imati pravo na prebijanje i/ili neplaćanje dugovanja povezanih sa obavezama nastalim u vezi sa *Aukcijom*, na osnovu drugih potraživanja prema *CGES-u* i/ili *EMS-u*, bilo da jesu, ili nisu posljedica *Aukcije*.

Član 7.3 Plaćanje za dnevne aukcije

Plaćanje za *Dodijeljene kapacitete* će se vršiti na osnovu računa za mjesečni iznos. Ovaj iznos se plaća za prethodni mjesec na osnovu računa koji izdaje *Aukcijska kuća*.

Račun obuhvata plaćanja za sve dnevne *Aukcije*. Krajnji rok za izdavanje računa je prvi radni dan u narednom mjesecu. Krajnji rok za dospijeće plaćanja po računu je devet kalendarskih dana od dana izdavanja računa.

Ako se plaćanje ne izvrši do datuma dospijeća, *Aukcijska kuća* će narednog *Radnog dana* upozoriti *Učesnika na aukciji*, faksom ili elektronskom poštom da uplata računa nije izvršena na račun *Aukcijske kuće*.

Ako uplata ne bude primljena jedan *Radni dan* poslije krajnjeg roka za dospijeće plaćanja po računu učešće *Učesnika na aukciji* u mjesečnim i dnevnim *Aukcijama*, kao i unutar dnevnim alokacijama će biti suspendovano sve dok *Učesnik na aukciji* ne izvrši sva plaćanja dospjela na naplatu.

Odjeljak 8. Korišćenje dodijeljenog kapaciteta

Član 8.1 Nacionalni komercijalni uslovi

Opšta pravila pristupa mreži za korišćenje *Dodijeljenog kapaciteta* nisu pokrivena *Pravilima za dnevne aukcije* osim ukoliko drugačije nije navedeno u sljedećim odredbama.

EMS i *CGES* će izvršiti uslugu prenosa prema rezultatima *Aukcije* i u skladu sa propisima koji se odnose na pristup prenosnom sistemu u svakoj od *Zona trgovanja* i u skladu sa važećim tržišnim pravilima *EMS-a* i *CGES-a*.

Nakon rezervacije kapaciteta na *Aukciji*, *EMS* i *CGES* se obavezuju da će *Učesniku na aukciji* garantovati *Dodijeljeni kapacitet* osim u slučaju *Više sile* i/ili neplaniranih stanja u sistemu.

Operatori prenosnog sistema utvrđuju sljedeće predušlove za korišćenje *Dodijeljenog kapaciteta* i za korišćenje njihovih prenosnih mreža:

- **na strani *EMS-a*** – Pravno lice ili preduzetnik koji je zaključio ugovor o balansnoj odgovornosti sa *EMS-om* (srpski *ITR*).
- **na strani *CGES-a*** – Pravno ili fizičko lice, odnosno preduzetnik, koje je registrovano kod operatora prenosnog sistema i operatora tržišta kao učesnik na tržištu Crne Gore u skladu sa tržišnim pravilima odnosno zaključilo ugovor o balansnoj odgovornosti sa operatorom tržišta i operatorom prenosnog sistema (crnogorski *ITR*).

Član 8.2 Nominacija Dodijeljenog kapaciteta

Korišćenje *Dodijeljenog Kapaciteta* je u skladu sa uslovima navedenim u članu 8.1.

Pošto se završi procedura za dnevne *Aukcije* i objava rezultata, stiču se uslovi za korišćenje *Dodijeljenih kapaciteta* tako što se dostavljaju planovi prekograničnih razmjena na osnovu dnevnih *Dodijeljenih kapaciteta* do isteka vremena za dnevne prijave planova razmjena u 14:30h (SEV), u skladu sa pojedinačnim, nacionalnim tržišnim pravilima svakog od *Operatora prenosnih sistema* koja se primjenjuju u vrijeme dostave.

Prijava plana prekograničnih razmjena za naredni dan po osnovu *Dodijeljenog kapaciteta* ostvaruje se kroz jednu ili više transakcija, u jednom smjeru, pri čemu zbir prijavljenih transakcija ne smije biti veći od *Dodijeljenog kapaciteta ITR –a*, a jedan od učesnika u transakciji je uvijek *ITR* koji ima *Dodijeljen kapacitet* ("M:N"- prijava dnevnih planova).

Dostavljeni planovi prekogranične razmjene moraju da sadrže podatke koji nedvosmisleno određuju *Dodijeljeni kapacitet* (jedinствена *Identifikacija ugovora o kapacitetu* i tip kapaciteta).

CGES i *EMS* vrše usaglašavanje dostavljenih pojedinačnih planova prekograničnih razmjena na zajedničkoj granici. Izmjena neusaglašanih prekograničnih planova razmjena moguća je do isteka vremena za proces usaglašavanja u 15:30h (SEV). Poslije navedenog roka srpski i crnogorski *ITR* ne smiju vršiti izmjene dostavljenih planova razmjena.

Ako još uvek postoji neusklađenost, *CGES* i *EMS* će izmijeniti dostavljene planove razmjena u skladu sa sljedećim pravilima:

- Kada se vrijednosti razlikuju, uzima se niža vrijednost.
- Kada nedostaju vrijednosti od prekograničnog partnera, ili smjerovi nisu ispravni, uzimaju se nulte vrijednosti.

U trenutku isteka vremena za proces usaglašavanja fiksni planovi prekograničnih razmjena će biti u potpunosti prihvaćeni, djelimično prihvaćeni ili odbijeni (t.j. nula vrijednost se prihvata) u skladu sa rezultatom usaglašavanja.

Ovo korišćenje se zasniva na principu "iskoristi ili izgubi". To znači da će *Kapacitet* koji je dodijeljen u dnevnoj aukciji, a koji nije iskorišćen kroz fiksne planove razmjena u ovom trenutku, biti stavljen na raspolaganje svim učesnicima na tržištu u skladu sa postupkom za unutarnevne alokacije.

Odjeljak 9. Prenos prava na dodijeljeni kapacitet

Za Kapacitet dodijeljen na dnevnim *Aukcijama* nije moguć prenos prava na *Kapacitet*.

Odjeljak 10. Ograničavanje kapaciteta

Dodijeljeni kapacitet može biti ograničen u slučaju *Vanredne situacije* ili *Više sile*.

Ograničavanje *Dodijeljenog kapaciteta* može da se primijeni prije isteka vremena za proces usaglašavanja.

Ograničavanja *Kapaciteta* ili redukcije planova rada će se odnositi na period od jednog ili više sati.

Operator prenosnog sistema koji je zahtijevao ograničavanje mora opisati razloge i posljedice ograničavanja na rješavanja problema u mreži ili sistemu i to će objaviti oba *Operatora prenosnog sistema*.

U slučaju ograničavanja *Dodijeljenih kapaciteta* ili redukcije planova rada primjenjuje se sljedeći redoslijed:

1. *Dodijeljeni kapacitet* na unutarnevnoj dodjeli
2. *Dodijeljeni kapacitet* na dnevnoj *Aukciji*
3. rezervisani ili *Dodijeljeni kapacitet* na mjesečnoj *Aukciji*

4. rezervisani ili *Dodijeljeni kapacitet* na godišnjoj *Aukciji*.

U okviru svake iz gore navedenih grupa *Kapaciteta*, korišće se proporcionalno ograničavanje *Kapaciteta*.

Ako su ograničeni dnevni *Dodijeljeni kapaciteti*, unutar dnevna dodjela će biti obustavljena na odgovarajućoj granici i smjeru.

Prije isteka vremena za postupak usaglašavanja, *Aukcijska kuća* je dužna smanjiti *Dodijeljene kapacitete* na osnovu zahtjeva jednog ili oba *Operatora prenosnih sistema*, u skladu sa važećim *Pravilima za dnevne aukcije*.

Aukcijska kuća (na osnovu zahtjeva *CGES-a* i/ili *EMS-a*) obavještava nosioca prava na *Kapacitet* o ograničavanju *Dodijeljenih kapaciteta* i dostavlja vrijednosti smanjenih *Kapaciteta*. Srpski i crnogorski *ITR* moraju dostaviti *EMS-u* i *CGES-u* dnevne prekogranične razmjene koji uzimaju u obzir smanjene *Kapacitete*.

U slučaju ograničavanja *Dodijeljenog kapaciteta* iz dnevne *Aukcije* prije isteka vremena za proces usaglašavanja, *Učesnik na aukciji* čiji je *Dodijeljeni kapacitet* ograničen će platiti samo za preostali dio *Kapaciteta*, kao i u slučaju *Više sile*.

Odjeljak 11. Suspenzija Učesnika na aukciji

Ukoliko *Učesnik na aukciji*:

- a) na bilo koji način prekrši *Pravila za dnevne aukcije*;
- b) svojim ponašanjem utiče ili ugrožava tržišno takmičenje u procesu dnevne raspodjele *Kapaciteta*;
- c) izgubi licencu, proglasi bankrot, postane insolventan ili mu se odredi zabrana plaćanja tog *Učesnika na aukciji*, nakon potvrde drugog *Operatora prenosnog sistema*, *CGES*, odnosno *EMS* bez odlaganja može suspendovati iz procedura dnevne raspodjele. *Učesnik na aukciji* će o suspenziji bez odlaganja biti obaviješten faksom i elektronskom poštom.

Odjeljak 12. Razno

Član 12.1 Odgovornost

Aukcijska kuća će biti odgovorna za štetu nastalu grubim nemarom ili namjernom greškom *Aukcijske kuće*. U tom slučaju, primjenjuju se sljedeća pravila:

Potraživanja za štete koje su nastale zbog, ili su povezane sa ovim *Pravilima za dnevne aukcije* se ograničavaju na štete koje su uobičajene i predvidive.

Aukcijska kuća se ne smatra odgovornom za bilo koji gubitak profita, gubitak posla ili neke druge prateće indirektno, posebne ili posljedične štete bilo koje vrste.

Obaveza *Aukcijske kuće* se ograničava na ukupno 5000 € po jednom *Učesniku na aukciji* i godini.

Ista ograničenja važe i za *EMS* i *CGES*, ukoliko se smatra da su odgovorni, uprkos činjenici da je *Ugovor* zaključen između *Aukcijske kuće* i *Učesnika na aukciji*. U ovom slučaju, ograničenje od 5000 € važi za sve zajedno – *CGES* (u ulozi *Aukcijske kuće*) i *EMS*.

Aukcijska kuća se obavezuje da profesionalno izvrši svoje dužnosti i postupa u skladu sa svojim obavezama po ovim *Pravilima za dnevne aukcije*, kao odgovorno preduzeće i odgovorni operator *Zone trgovanja*, u skladu sa važećim zakonima i propisima u sektoru energetike. *Operatori prenosnog sistema* su preuzeli slične obaveze prema *Aukcijskoj kući*.

Član 12.2 Komunikacija

Osobe za kontakt imenovane u ime *Aukcijske kuće* za komunikaciju navedene su u Aneksu 2.

Aukcijska kuća i svaki *Učesnik na aukciji* imaju pravo da izmijene listu osoba za kontakt.

Aukcijska kuća je dužna da na web stranici pruži obavještenje o svakoj izmjeni u listi osoba za kontakt i da o tome obavijesti *Učesnike na aukciji* putem faksa ili elektronske pošte. Novi podaci za kontakt *Aukcijske kuće* postaju zvanični jedan (1) *Radni dan* poslije prosljeđivanja elektronske pošte ili faksa. *Učesnik na aukciji* je dužan da najavi izmjene u skladu sa članom 3.1 ovog dokumenta.

Ova *Pravila za dnevne aukcije* i sva povezana obavještenja, pravne procedure i komunikacije u skladu s njima, kao i procedure za rješavanje sporova iz člana 12.4 *Pravila za dnevne aukcije* biće na crnogorskom jeziku, u obimu predviđenom zakonom i propisima koji se direktno ili indirektno odnose na ove procedure.

Osim ako nije drugačije navedeno u ovim *Pravilima za dnevne aukcije*, smatraće se da je dostava elektronske pošte izvršena onog trenutka kada je pošiljaocu potvrđeno da je elektronska poruka dostavljena primaocu, i/ili primalac potvrdi njen prijem.

U slučaju teškoća pri korišćenju elektronske pošte, obavještenja se mogu dostaviti faksom, isporučiti lično, kurirskom službom ili poštom, a smatraće se da je usluga izvršena na dan prijema.

U slučaju bilo kakve nejasnoće, *Učesnik na aukciji* ili *Aukcijska kuća*, od strane koja šalje poruku imaju pravo zatražiti da ponovi postupak.

Aukcijska kuća je dužna arhivirati cjelokupnu komunikaciju preko *Aukcijske DA platforme*. Svaki *Učesnik na aukciji*, kao i *Aukcijska kuća*, se ovim obavezuje da neće osporavati, ni smatrati nevažećom, aktivnost koja se realizuje preko *Aukcijske DA platforme*, u skladu sa ovim *Pravilima za dnevne aukcije*, na osnovu činjenice da su odgovarajuće radnje izvršene u formi elektronske razmjene podataka. Pored toga, svaki *Učesnik na aukciji*, kao i *Aukcijska kuća*, izjavljuju da će dnevne podatke iz baze podataka *Aukcijske kuće* koji su pripremljeni u skladu sa ovim *Pravilima za dnevne aukcije* smatrati pouzdanim dokazom, osim ako se ne dokaže drugačije.

Vrijeme upisano na poruci prilaže se uz svaku poruku koja ide ili se prima sa *Aukcijske DA platforme*. Ova oznaka vremena koristi sistemsko vrijeme sa *Aukcijske DA platforme*.

Ako se rad *Aukcijske DA platforme* <https://ess.cges.me/Auction-Client/> prekine i/ili obustavi svi relevantni *Korisnici Aukcijske DA platforme* će, bez odlaganja, biti obaviješteni o prekidu ili obustavi rada *Aukcijske DA platforme*.

Član 12.3 Sigurnost i zaštita podataka

Komercijalni podaci koje *Učesnik na Aukciji* šalje preko interneta na *Aukcijsku DA platformu* su zaštićeni kodiranjem (SSL). Za svaku razmjenu poslovnih podataka, koristi se standardni PKI (*Public key infrastructure*), koji obezbjeđuje *Aukcijska kuća*. Ovaj mehanizam omogućava izdavanje ovlaštenja za transakcije i odgovarajuću identifikaciju *Učesnika na aukciji* koji je unio podatke u *Aukcijsku DA platformu*, ili je izvršio specifične operacije. Sve operacije sprovedene preko sistema *Aukcijske DA platforme* se registruju, uključujući i podatke o *Učesniku na aukciji* i *Vremenu upisanom u poruci*.

Svaki *Učesnik na aukciji* se obavezuje da poštuje sva sigurnosna pravila koja su navedena u *Pravilima za dnevne aukcije*. *Učesnik na aukciji* se posebno obavezuje da vodi računa o tome da:

- *Korisnik* koji je ovlašten za podnošenje *Ponude*, čuva svoj privatni ključ tako da nijedna druga osoba nema pristup tom ključu;
- *Korisnik* koji je ovlašten za podnošenje *Ponude* svoj privatni ključ i potvrdu koristi isključivo u skladu sa *Pravilima za dnevne aukcije*;
- *Korisnik* koji je ovlašten za podnošenje *Ponude* odmah obavijesti *Aukcijsku kuću* o otkrivanju, ili potencijalnom otkrivanju njegovog privatnog ključa.

Aukcijska kuća je ovlaštena da koristi sve podatke o *Učesnicima na aukciji* i *Aukcijama* i da ih pošalje *Operatorima prenosnih sistema*, kao i da ih objavi u skladu sa uslovima ovih *Pravila za dnevne aukcije*.

Za ostalo, *Operatori prenosnih sistema* se obavezuju da ni za koje druge svrhe ne koriste ni na neki drugi način obrađuju podatke dobijene u skladu sa ovim *Pravilima za dnevne aukcije*, osim u cilju izvršenja obaveza u skladu sa ovim pravilima. *Operatori prenosnih sistema* ne smiju objelodaniti podatke bilo kom trećem licu, osim licima koja, u skladu sa zakonom, imaju pravo zahtijevati podatke, a koja su na odgovarajući način preuzela obavezu čuvanja povjerljivosti podataka.

Član 12.4 Rješavanje sporova, mjesto rješavanja i zakon koji se primjenjuje

Na ova *Pravila za dnevne aukcije* se primjenjuju zakoni Crne Gore (izuzev zakona koji se odnose na međunarodno privatno pravo u Crnoj Gori) i ona se tumače u skladu sa tim zakonima, kao i sa *Uredbom EU 714/2009* i *Ugovorom o Energetskoj zajednici*. Kako bi se izbjegle nedoumice, ne primjenjuje se Konvencija UN o međunarodnoj prodaji dobara.

U slučaju spora, ili razlika koje se mogu pojaviti zbog primjene *Pravila za dnevne aukcije* i njihovih Aneksa, ili u vezi sa kršenjem, raskidom ili njihovog proglašenja ništavnim i nevažećim, strane u sporu bi trebale pronaći sporazumno rješenje. Pokretač postupka je dužan da detaljno opiše i predstavi svoj prigovor i navede član iz *Pravila za dnevne aukcije* koji je prekršen. U slučaju da sporazumno rješenje ne može biti postignuto u roku od trideset (30) dana nakon prvog obavještenja o razlogu za spor, tada će, uz izuzeće redovnih sudova, sve sporove koji nastanu u vezi sa *Pravilima za dnevne aukcije* rješavati tročlana arbitražna komisija u skladu sa pravilima za arbitražu i mirenje Međunarodnog arbitražnog centra Austrijske

federalne privredne komore u Beču (Vienna Rules). Primjenjivaće se materijalno pravo Austrije. U arbitražnim postupcima će se koristiti engleski jezik. Strane u sporu su dužne da odluku naprijed navedenih arbitara prihvate kao konačnu i obavezujuću, a odluka može da se preda sudu koji ima nadležnost, ili može da se podnese zahtjev sudu za sudsko prihvatanje odluke te da se naloži njeno sprovođenje, što zavisi od slučaja do slučaja. Sve troškove nastale kao posljedica arbitražnog postupka u skladu sa ovim *Pravilima za dnevne aukcije* snosiće strana koja izgubi spor, osim ako nije drugačije predviđeno arbitražnom odlukom.

Nadležni sud za sve sporove koji su rezultat aukcijskih postupaka za dnevne *Aukcije* je sud u registrovanom sjedištu *Aukcijske kuće*.

Mjesto izvršenja svih obaveza *Učesnika na aukciji* koje su rezultat dnevnih *Aukcija* održanih u skladu sa *Pravilima za dnevne aukcije* je registrovano sjedište *Aukcijske kuće*.

Naprijed navedene odredbe ovog člana nemaju uticaj na pravo *Učesnika na aukciji* koji učestvuje na *Aukciji* da regulatornom tijelu podnese žalbu protiv *Operatora prenosnog sistema* koji odbije korišćenje i pristup prenosnom sistemu, u skladu sa nacionalnim zakonom kojim se primjenjuje *Uredba EU 714/2009*.

Član 12.5 Rok važenja, stupanje na snagu te izmjene i dopune Pravila za dnevne aukcije

Pravila za dnevne aukcije stupaju na snagu nakon odobrenja od strane nadležnih regulatornih tijela, a primjenjuju se za dodjelu *Kapaciteta* za 2023. godinu i nadalje, u oba smjera na granici Crna Gora - Srbija.

Principi *Pravila za dnevne aukcije* mogu se mijenjati, a *Učesnik na aukciji* će biti unaprijed obaviješten o njihovim izmjenama i dopunama.

Prije nego što postanu važeća, za *Pravila za dnevne aukcije* i njihove moguće izmjene i dopune, mora biti dobijena saglasnost regulatornih tijela.

Ukoliko se odlukom arbitraže, suda ili regulatornog tijela bilo koja odredba iz ovih *Pravila za dnevne aukcije* proglasi nevažećom, nezakonitom ili nesprovodivom, to ne utiče na punovažnost, zakonitost i pravosnažnost preostalih odredbi ovih pravila. Isto važi i u slučaju nenamjernih razlika u ovim *Pravilima za dnevne aukcije*.

Moguće izmjene i dopune *Pravila za dnevne aukcije* u vezi sa dnevnim *Aukcijama* moraju biti objavljene na internet strani *Aukcijske kuće* najkasnije deset (10) kalendarskih dana prije nego što te izmjene i dopune stupe na snagu.

Pristupanjem *Aukciji* poslije objavljivanja dopuna i/ili izmjena, *Učesnik na aukciji* prihvata da poštuje onu verziju *Pravila za dnevne aukcije* koja je tada na snazi i kao takva se primjenjuje.

Član 12.6 Spisak aneksa

Aneks 1	Registracioni obrazac
Aneks 2	Spisak osoba za kontakt
Aneks 3	Spisak državnih praznika u Crnoj Gori
Aneks 4	Postupak žalbe

Aneks 5 Registracija na Aukcijsku DA platformu

Aneksi čine sastavni dio *Pravila za dnevne aukcije*.

Aneks 1. Registracioni obrazac

Registracioni obrazac za učešće u dnevnim aukcijama na granici Crna Gora – Srbija

Ime kompanije/ preduzetnika	
Adresa, zemlja	
Broj iz Registra privrednih subjekata	
Ime i prezime predstavnika	
PDV broj	
ID broj / PIB	
Adresa elektronske pošte	
Broj telefona	
Broj faksa	
EIC kod za identifikaciju Učesnika na Aukciji	

Dostavljanjem ovog registracionog obrasca sa važećim potpisom, preduzeće/preduzetnik koji se identifikuje na osnovu gornje tabele (u daljem tekstu *Učesnik na aukciji*) izjavljuje da je u potpunosti upoznat sa važećim *Pravilima za dnevne aukcije* koja su objavljena na internet strani *Aukcijske kuće* i da ih pravno obavezujuće i neopozivo prihvata.

Učesnik na aukciji takođe pravno obavezujuće i neopozivo izjavljuje da prihvata moguće izmjene i dopune *Pravila za dnevne aukcije* kako se navodi u članu 12.5 *Pravila za dnevne aukcije*.

Učesnik na aukciji izjavljuje i to da on predstavlja preduzetnika ili preduzeće osnovano po zakonu, da nije predmet stečaja ni bankrota te da se protiv njega ne vodi nikakav sudski, ili neki drugi postupak koji bi mogao ugroziti ispunjavanje uslova navedenih u *Pravilima za dnevne aukcije*.

Učesnik na Aukciji takođe izjavljuje da nema neizmirenih dugova prema *EMS-u* ni *CGES-u*.

Potvrdom registracionog obrasca zaključuje se *Ugovor* između *Aukcijske kuće* i *Učesnika na aukciji* za *Aukcije* na granici Crna Gora - Srbija. *Pravila za dnevne aukcije* čine opšte uslove *Ugovora*. *Aukcijska kuća* je potvrđivanjem registracionog obrasca registrovala *Učesnika na aukciji*.

Ova izjava važi za neograničeni broj dnevnih *Aukcija*, bez obzira na obavezu *Učesnika na aukciji* da odmah obavijesti *Aukcijsku kuću* o bilo kojim izmjenama, i bez obzira na pravo *Aukcijske kuće* da traži obnavljanje ove izjave.

Učesnik na aukciji izjavljuje da registracioni obrazac i njegovi prilozi sadrže kompletne i istinite podatke.

Ovaj registracioni obrazac je sačinjen u 3 (tri) identična primjerka, od kojih su 2 (dva) za *Aukcijsku kuću*, a 1 (jedan) za *Učesnika na aukciji*.

Učesnik na aukciji izjavljuje da registracioni obrazac i prilozi sadrže kompletne i istinite podatke.

Prilozi:

1. Spisak ovlaštenih predstavnika koji imaju pravo da komuniciraju sa *Aukcijskom kućom* i daju izjave *Aukcijskoj kući* koje su obavezujuće za *Učesnika na aukciji*
2. Originalni ili ovjeren primjerak izvoda iz Registra privrednih subjekata (na crnogorskom ili jednom od zvaničnih jezika u CG, ili engleskom jeziku)
3. Originalni ili ovjeren primjerak Potvrde o registraciji poreskog obveznika

Za Učesnika na aukciji

Dana: _____

Potpis

Crnogorski elektroprenosni sistem AD Podgorica kao *Aukcijska kuća* odobrava registracioni obrazac i registruje ovim zaključen *Ugovor* između *CGES-a* i *Učesnika na aukciji* pod registracionim brojem: _____

Za CGES

Dana: _____

Potpis

Dodatak 1 Aneksa 1

Spisak ovlaštenih predstavnika *Učesnika na aukciji*

Učesnik na aukciji imenuje sljedeće osobe kao ovlaštene da postupaju u ime *Učesnika na aukciji*:

- za potpisivanje *Ugovora*

Ime i prezime	Broj telefona	Broj mobilnog	Broj faksa	Adresa elektronske pošte

- za potpisivanje Izjave o preuzimanju i korištenju ele

Ime i prezime	Broj telefona	Broj mobilnog	Broj faksa	Adresa elektronske pošte

- za dostavljanje *Ponuda Aukcionoj kući*

Ime i prezime	Broj telefona	Broj mobilnog	Broj faksa	Adresa elektronske pošte

- za finansijska pitanja

Ime i prezime	Broj telefona	Broj mobilnog	Broj faksa	Adresa elektronske pošte

Adresa preduzeća/preduzetnika (popuniti ako se adresa menja)	
---	--

Učesnik na aukciji izjavljuje da će svaki *Korisnik* biti obučen i instruiran u skladu sa *Pravilima za dnevne aukcije*.

Učesnik na aukciji se obavezuje da će *Aukcijsku kuću* odmah obavijesti o izmjenama podataka iz ovog obrasca.

Datum

Za *Učesnika na aukciji*

Potpis

Aneks 2. Spisak osoba za kontakt

Učesnik na tržištu *Aukcijskoj kući* mora dostaviti **registracioni obrazac** (vidjeti Aneks 1 na sljedeću adresu:

Crnogorski elektroprenosni sistem AD – Podgorica

NDC

Bul. Svetog Petra Cetinjskog 18

20000 Podgorica

Crna Gora

Za lične dostave na gore navedenu adresu, Arhiva radi *Radnim danima* od 09:00 do 14:00h (SEV).

Potvrda koju izda Arhiva *Aukcijske kuće* potvrđuje samo datum i vrijeme prijema dokumenta, a ne da li je dokument ispravan i kompletan.

Učesnici na aukciji moraju dostaviti skenirani obrazac za **registraciju** (vidjeti Aneks1) na sljedeću adresu elektronske pošte:

EMS: schedule@ems.rs

Učesnici na Aukciji mogu koristiti druge vrste komunikacija sa *Aukcijskom kućom* preko sljedećih brojeva faksa i kontakata:

Registracija Učesnika na Aukciji

Ime i prezime	Broj telefona	Adresa elektronske pošte	Broj faksa
Biljana Ivanović	+382 20 407 622	biljana.ivanovic@cges.me	+382 20 225 962
Mirjana Božović Glogovac	+382 20 414 762	mirjana.glogovac@cges.me	

Aukcijska DA platforma – korisnička podrška (operatori Aukcijske DA platforme) – Funkcionisanje dnevnih Aukcija i druga operativna pitanja

	Broj telefona	Adresa elektronske pošte	Broj faksa
Biljana Ivanović	+382 20 407 622	biljana.ivanovic@cges.me	+382 20 225 962
Mirjana Božović Glogovac	+382 20 414 762	mirjana.glogovac@cges.me	

Aukcijska DA platforma – informaciono-tehnička podrška

– Pristup informacionom sistemu

	Broj telefona	Adresa elektronske pošte	Broj faksa
Biljana Ivanović	+382 20 407 622	biljana.ivanovic@cges.me	+382 20 225 962
Mirjana Božović Glogovac	+382 20 414 762	mirjana.glogovac@cges.me	
Nikola Vidović	+382 20 416 806	nikola.vidovic@cges.me	

Finansijska pitanja

	Broj telefona	Adresa elektronske pošte	Broj faksa
Mladen Ševaljević	+382 20 407 630	mladen.sevaljevic@cges.me	+382 20 225 962
Ana Bojat	+382 20 407 648	ana.bojat@cges.me	

Aneks 3. Spisak državnih praznika u Crnoj Gori

01.01.	Nova godina
02.01.	Nova godina
01.05.	Praznik rada
02.05.	Praznik rada
21.05.	Dan nezavisnosti
13.07.	Dan državnosti

Aneks 4. Postupak žalbe

Posebna inicijativa u vezi sa dnevnim *Aukcijama*

Ukoliko *Učesnik na aukciji* dođe do zaključka da su *Pravila za dnevne aukcije* prekršena pogrešnim proračunom, nepravilnim rezultatom provjere podataka ili pogrešnom evaluacijom, *Učesnik na aukciji* ima pravo da, preko svog predstavnika, pokrene postupak provjere. Zahtjev se dostavlja osobama za kontakt iz *Aukcijske kuće* faksom ili preporučenom poštom, u roku od dva (2) *Radna dana* od dana prijema fakture, ili drugog relevantnog dokumenta, i mora da sadrži:

- datum,
- identifikaciju *Učesnika na aukciji*,
- ime, adresu elektronske pošte i telefone osobe za kontakt,
- kratak opis situacije tj. predmet prigovora,
- detaljan opis situacije,
- valjane dokaze (kopije iz dnevnika, evidencija o komunikaciji, itd.).

Ako strane ne mogu postići dogovor u roku od 30 dana, *Učesnik na aukciji* može uputiti žalbu relevantnom nacionalnom regulatornom tijelu, u skladu sa nacionalnim zakonodavstvom i *Uredbom EU*.

Operatori prenosnog sistema su dužni da za postupak koji sprovodi regulatorno tijelo pruže sve informacije koje su mu neophodne da u predviđenom roku obradi žalbu.

Na osnovu naprijed opisane inicijative ne može se odložiti objavljivanje i potvrda rezultata relevantne dnevne *Aukcije*.

Aneks 5. Registracija na aukcijsku DA platformu

Učesnik na aukciji

Puni naziv:	
EIC kod:	
Ovlašteno lice:	

Učesnik na aukciji zahtijeva:

- postavku (*setup*)
- modifikaciju
- brisanje

korisničkog naloga na Aukcijskoj DA platformi za sljedećeg korisnika:

Korisnik

Ime i prezime:		
Elektronska adresa:		
Telefon:		
	Šalje	Prima

Na osnovu Pravila za dnevne aukcije, čiji je sadržaj poznat gore navedenom korisniku, korisnik je ovlašten za obavljanje operacija na Aukcijskoj DA platformi u skladu sa pravima korisnika i u tom slučaju zastupa gore navedenog Učesnika na aukciji.

Informacije za prijavljivanje (korisničko ime i lozinka) korisniku će biti poslani na gore navedenu elektronsku adresu (e-mail), a on je obavezan da lozinku promijeni prilikom prvog prijavljivanja

Datum _____

Ovlašteno lice *Učesnika na aukciji*

Korisnik